

04/02/1998

Umno tidak boleh ambil tindakan

Ahmad Burak

KUALA LUMPUR, Selasa - Umno tidak boleh mengambil sebarang tindakan kepada ahli yang melanggar nasihat untuk tidak bertanding dalam pemilihan bulan depan, walaupun nasihat supaya mengadakan perundingan sudah dibuat oleh presiden parti.

Setiausaha Agung, Datuk Sabbaruddin Chik, berkata dari segi perlembagaan, tiada tindakan boleh dikenakan kepada ahli yang ingkar kerana ia diberi dalam bentuk nasihat.

Bagaimanapun, katanya, tindakan disiplin boleh diambil jika presiden mengeluarkan larangan dalam bentuk arahan.

"Kalau presiden kata runding... rundinglah. Apa susah sangat, kalau tak hendak dengar cakap presiden, nak dengar cakap siapa lagi. Kalau presiden kata tak perlu bertanding, ikutlah. Dia presiden.

"Kalau kita tak menghormati presiden kita, tak menghormati timbalan presiden, kita hendak hormati siapa. Dalam persatuan, organisasi atau kesatuan, bila tak hormat presiden atau timbalan presiden nak hormati siapa," katanya kepada Berita Harian, hari ini.

Beliau mengulas nasihat Perdana Menteri yang juga presiden Umno, Datuk Seri Dr Mahathir Mohamad, minggu lalu bahawa Umno berusaha memastikan pemilihan bagi jawatan parti di peringkat bahagian pada Mac depan dilakukan secara rundingan, bukan pertandingan.

Menurutnya, MT akan menjelaskan kepada ahli dan pemegang jawatan parti peringkat bahagian supaya mencapai persetujuan di kalangan mereka bagi mengelak pertandingan demi kepentingan parti.

Bagaimanapun, beberapa pemimpin Umno, khususnya di Kelantan kemudian mengeluarkan kenyataan bahawa pertandingan perlu diadakan di sesetengah bahagian kerana faktor tertentu.

Sabbaruddin berkata, sebagai setiausaha agung, dia tidak berniat untuk menasihati mereka yang ghairah ingin bertanding untuk kembali ke meja perundingan kerana nasihat sudah diberikan oleh Dr Mahathir selaku presiden parti.

"Pemimpin atau ahli Umno seharusnya mendengar nasihat itu kerana ia bertujuan untuk menjaga kepentingan dan perpaduan parti. Kalau presiden parti kata bincang, maknanya bincanglah.

"Tak semestinya orang yang tak ada jawatan tak boleh dapat jawatan kalau tak bertanding. Bincanglah... Ada banyak jawatan dalam parti, ketua bahagian, timbalan, naib, setiausaha, bendahari, ketua penerangan dan jawatankuasa," katanya.

Berhubung laporan sesetengah pemimpin atau ahli parti yang dikatakan mengatur perwakilan cawangan untuk mendapatkan sokongan pada pemilihan bahagian, Sabbaruddin berkata, jika laporan itu benar, ia mungkin dibuat sebelum nasihat dikeluarkan oleh presiden.

"Selepas Dr Mahathir nasihat, mereka mungkin berubah dan menyerahkan mandat sepenuhnya kepada perwakilan cawangan untuk menentukan pemimpin yang layak di peringkat bahagian," katanya.

Umno menetapkan persidangan tahunan cawangan bermula 12 Februari hingga 15 Mac ini, manakala persidangan perwakilan bahagian diputuskan mulai 12 Mac hingga 29 Mac ini.

(END)